

Kristian Ṭhalai Pawl chanchinbu thla tin chhuak

1970-a chhuah ṭan - Kum 48-na vawi 11-na - Chhuah tawh zat : 480

Editor :

Robert Lalduhzuala

Joint Editors :

C. Malsawmtluanga

Lalsiammawia Pachuaau

Malsawmtluanga

K.Lalchhanhima

Manager:

Lalrinchhana Ralte

A lak man :

Kum khatah - ~ 80.00

Copy khat - ~ 7.00

*Thu chhuah tūr nei chuan Editor,
Kristian Ṭhalai, Synod Office-ah thawn
tūr a ni a; a la dūh chuan KṬP Office-ah a
man pēk lāwk a ngai.*

Office Phone : 8794796008

E-Mail :

kristianthalai1970@gmail.com

centralktp@gmail.com

KRISTIAN ṬHALAI PAWL

Thupui

Rawngbawl tūra chhandam

Thupui inngahna

Ephesi 2:10. Thil ṭha ti atán
Krista Isuaah chuan siama awmin,
ama kutchhuak kan ni si a, chu thil
ṭha tih chu kan awmna tūrin
Pathianin a buatsaih lāwk a ni.

Thiltumte

1. Isua Krista rinna leh amah anna
kawnga ṭhalait hruai.
2. Kohhran kutke ni tura ṭhalait
buatsaih.
3. Kohhran hnathawh tihpuitlin.
4. Krista Chanchin Ṭha puan
darh.

A CHHUNGA THU AWM TE

1. Editorial	2
2. Sermon - Ṭawngṭaina	3
3. Article - <i>Thu awihna</i>	6
4. An chanchin - <i>The great Apologist of our time</i>	10
5. Ṭhalait suangtuahna - <i>Phengphehlep thla zap</i>	13
6. Hriselna - <i>Health Tips</i>	16
7. Hruaitute chanchin - <i>Tv. Robert Lalduhzuala</i>	18
8. Rimawi - <i>Vanram ropuia</i>	20
9. Awareness 2018	23
10. Ngaihnaawm Ngaihawm - <i>KṬP, Buarpu Bial</i>	24
11. Kantu - <i>Ramhlun Venglai Branch</i>	26
12. Hringlang tlang - <i>Hruaitu Arsi zai ri mawi</i>	28
13. Keimahni	29



Kristian Thalai Chanchinbu

Kristian Thalai chanchinbu hmanga Kristian Thalai Patol rawngbawlna hian sawi a hlawh tam lutuk lem lo va, rawngbawlna peng hrang pawimawh tak tak kan neih tam em vang te pawh a ni thei awm e. Chutih rual erawh chuan kan thlen theih lohna hmun thleng a, kan member Biak In hnaih ngai lem lote mut pindan thleng thin chu he rawngbawlna hi a ni a, KTP chetvelnaa an hmel kan hmuah ngai lohte hmaichhana va hmu theitu pawh hei tho hi a ni. Mi sual tia khawtlangin kan sawi – zu leh damdaw, mipat hmeichhiatna dai pelh laklawh sal tang mek tal chhuak hlei thei lo, home hrang hrang leh lung in thlenga kan aiawha umzuia, luhchhuah mektu chu he Kristian Thalai chanchinbu tho hi a ni. Chuvangin, Pathianin hei aia nasa zawka a hman theihna tur leh, hma a sawn theihna turin member zawng zawngte'n ngaihtuahna kan sen thar hi a pawimawhin, a va phu em!

Kum tam tak lo vei pawh ni se, K.T.P. rawngbawlna pawimawh tak takte thamral mai lova, vawng tha tlattu leh kumtluana ram puma thalaite'n a huhova rawngbawlna nget tak kan neih reng chu he chanchinbu rawngbawlna tho hi a ni. A thawm ring lo mah se a nget thung a, ri hluai lo mah se a darh zau thung si. Fakna aia sawiselna dawng hnem rawngbawlna a nih miau avangin a fei tlat a, a tihthat aia tihfuh loh leh a tihdik tam tak kara a dik lo awm chhun hrilhhriat than a nih avangin insiam tha turin a inkau reng a, hmasawwna atana hmang zawkin insiam that a hreh ngai lo. Chutiang pal tlang thin a nih avang chuan rawngbawlna awmzia a hre chiang em em a, hun harsa tak tak a pal tlang lai pawha nget taka ding thin a ni.

Kristian Thalai chanchinbuin rawngbawlna kawnga ke a pen dan ropui tak hi keini Kristian Thalai Patol member-te hian zir chiang ila, kan rawngbawlna kawngah zir chhuah tur kan neih ngei a rinawm.



Sermon

ṬAWNGṬAINA

*Rev. James Lalremmawia
Tawipui North II*

Thuhmahruai : Isua kan hmehhriat hma daih aṭangin kan pi leh pute khan anmahni aia ropui, engkimtithei awm ngeia hriain chumi hnenah chuan an lo ṭawngṭai daih tawh. Anni chu sawi loh, khawvel chanchinah hnam hrang hrangte hi an lo ṭawngṭai tawh ṭhin a, an tih dan erawh chu a in ang vek lo. Incas leh Aztecs-te phei chuan pathiante ngaihsak hlawnna turin mihring hial an hlan ṭhin.

*Ṭawngṭai hi duh thlenna hun a ni
mai lo va, duhthusam chiamna
hun phei chu a ni lo lehzual.*

*Tun lai kohhrante'n kan mamawh
chu Thlarau Thianghlim hman,
ṭawngṭai mi an ni.*

Bible-ah ngei pawh pathian biakna tura mihring hlan thu kan hmuh kha. Pathian awm ring lo kan tih te pawh hian ṭawngṭai chu an ngaihlu ngang a ni ang, a tih dan tur zawngin, Russia rama communist ho chanchinbu *Pravda* (Russian: "Thutak" - Communist Party chanchinbu, kum 1918 aṭanga 1991 thlenga an chhuah) 1950 kuma mi-ah chuan, harsat mangan lai leh tuilairapa awm laiin Stalin-a hnena ṭawngṭai ṭhin tura fuihna a chuang.

**Tunlai khawvelah ṭawngṭai
a la ṭul em?**

Khawvel a lo ṭhang zel a, loneitu, ruah tui tlak hun nghakhlel em em, khua a khen rei deuha van lam thlir, beisei dang nei lo ṭhinte khan tui lak kawng ṭha an neih takah chuan chung lam an auh eih kher a ngai tawh lo. Hri danna hrang hrang a lo chhuak a, thiamna a pung zel bawk nen Pathian kan auhna ṭhin tam tak natna kha doctor te'n an tidam thiam tlat tawh, "Zu vain zah a ngaih chuan hawp kharop kan thar mahna", ti ṭhinte kudamah Vai buhfai ip a ṭhu nghuk tawh a, thinlung taka ni tin ei khawp dil pawh a har zo ta.

Khawvel a hmanhmawh a, mi tin hi kan hmanhmawh vek tawh mai. "Ka hman lo," tih hi kan ṭawngkam hman zin a lo ni ta. Hetiang khawvel, mitin kan phet suau suauna tawhna hunah hian hmuh theih loh Pathian pawl tura hun nei kan tlem zual niin a hriat. Internet chakin kan ram a rawn thleng ve ṭan a, hmeh zeuhva a chhanna hmu turin Google lamtuang kan zawh ho mup mup a, nghah vang vang lamah kan pachhe zual zel. Chutiang khawvela cheng kan nih avang chuan a chhanna kan hmu nghal mai lova kan hriat ṭhin Pathian hnena thlen ai chuan social media-ah engkim – kan ngaihawng neih thar leh ṭhen thu, kan chawhmeh, mitthi in kal, thinrim, phai zin, lawmna – kan thlen a, chhanna hrang hrang pawh kan hmu rang khawp mai. Paulan, "...bang lovin ṭawngṭai ula..." (1 Thessalonika 5:7) a tih hi tunlai atan a la pawimawh reng em?

ṭawngṭai – Mamawh thlenna

Alexander Ropuia khawnbawlte zingah khan mi fang zet mai, mahse, sum leh pai lama pachhe tak si a awm a. ṭum khat chu Alexander-a ṭanpuina a dil ta ngawt a. Ani

chuan a mamawh apiang chu a sum bawm aṭanga lo la chhuak mai turin thu a rawn a. A pawisa dil a tam tham em avangin sum vawngtu chuan a lo remti awzawng lo mai a, Alexander-a hnenah thil awmzia a va sawi a, ani chuan, "Pe nghal vat rawh u. He mi fang hian min chawimawi nasa hle a nih hi. Hetiang taka tam tham min dil hi ka hausakzia leh ka thilphalzia a hriat vang a ni," a ti ta hlauh zawk a.

A hausakzia leh fapa meuh pawh ui lova min petu thilphalzia hretu tan chuan mamawh neih apianga ṭawngṭai tur em ni dawn? Chutiang chu ni ta sela mamawh neih chauhvin ṭawngṭai tur tihna a ni ang a, ṭawngṭaina hi mamawh dilnaah chauh kan ngai mai ang tih a hlauhawm.

ṭawngṭai – Pathian duh zawng zawnna

Abraham Lincoln-a kha US President a nih lai khan ṭum khat chu nu upa tawh lam hian chhan pawimawh sawi tur awm lem lovin hmuh a rawn tum ve teh flat a, buai hle mah se President chuan rem a lo ti mial bawka. A office chhunga a rawn lut chu chibai lo bukin tihsak theih a

neih leh neih loh a lo zawt thuai a.

Chu nu chuan President lak aṅga eng mah beisei a neih loh thu leh chu chu a lo kal chhan a nih loh thu sawiin, a ngainat zawng tak chhang a hriat thu leh chutiang chhang, ama siam ngei a rawn kensak thu a hrilh ta zawk a. President chuan mittui parawl kuang chungin, “Beisei nei lo mai ni lo, thilpek pe tur zawka ka hnena lo kal hmasa ber i ni. Thinlung takin lawm thu ka hrilh a che,” a lo ti e an ti.

Ṭawngṭaina hi kan duh zawng zawnna ni mai lovin Pathian duh zawng ngaihchanna a ni tih chu Lal Isuan a zirtirte ṭawngṭai dan a zirtir aṅga khan a Chiang viau. Vana kan Pa hming a lo zahawm leh he leia a ram thlen theihna kha dil hmasakah a neih miao kha.

Ṭawngṭai – Pathian nena inpawlina

Kan hnenah Pathian a awm reng a, chu kan hnena awm reng, fapa pawh ui lova kan tana min petu, chatuana a kianga kan awm vena tur kawng min hawnsak duh khawpa min thlahlel chu kan

pawl let vena leh a tana kan inserh hran ve hun a nih avangin a hlu a ni. Ṭawngṭai hi duh thlenna hun a ni mai lo va, duhthusam chiamna hun phei chu a ni lo lehzual. Mihringah hian ruak a awm tlat a. Chumi ruak chhun khah tak tak theihna awm chhun chu a siamtu leh dintu Pathian hnenah chauh a awm. Ṭawngṭaina hmangin chu Pathian chu kan zawng tlang ṭheuh va, keimahnia ruak chu Pathian nena inpawlina nungah chhun khahin a lo awm ṭhin a ni.

A tlangkawmna

He leia mihring taksa pua Lal Isua a awm lai khan tih ṭhana a neih chu ṭawngṭai a ni (Mt. 14:23; Mk. 6:46; Lk. 3:21, etc.). Lei leh van Lalber meuh pawhin tih ṭhana a neih chu a hnungzuitute hian kan ban thianga lo. Tunlai kohhrante’n tih dan thar, hmanraw ṭha leh khawl changkanga aia kan mamawh zawk chu Thlarau Thianghlim hman, ṭawngṭai mi an ni. Lung in aṅga Petera hruai chhuaktu chu vantirhkoh a ni ngei mai a; mahse, vantirhkoh au thlatu chu ṭawngṭaina a ni thung tih hi i vawng reng ang u.



THU AWIHNA

M. Stacy Muanpuui

(1 Samuela 15:22-23) ' Tin, Samuela chuan, "Lalpa chuan Lalpa thu zawm chu a lawm angin halral thilhlante leh inthawinate hi a lawm em ni? Ngai teh, inthawina aiin thu awih chu a tha zawk a, berampa thau aiin a thu pawm chu a tha zawk a ni.'

Lal Isua hnung kan zui a, rawng kan bawlna kawnga pawimawh ber pawl chu 'Thu awihna' hi a ni. Tunlai khawvelah hmasawwna a thang chak em em a, kan hamthatna tur umin thalai tam tak kan tlan a. Chung karah chuan Pathian rawngbawl hi tawrhna leh channa hlir emaw tiin thalai tam tak chuan Lalpa rawng an bawl duh lo. Kristian Thalai member ni rual KTP leh kohhrana inhmang ngam ta meuh lo hi mi tam tak kan awm ta. Hei hi Setana bumna a ni.

Isua hnung kan zui avanga kan tawrh leh chan turte hi chu awm bawk mah se, malsawmnain min vur leh nghal thin a ni. A chan ngamte apiang chungah malsawmna leh a thiltihtheihna a lantir nasa zual thin.

Thu awihna chung changah hian ka lo tawn ve tawhte atangin tlem azawng ka'n sawi teh ang.

Pathian khawngaihna azarah zaia sawmna te kan han dawng a, kan zai kan zai ve ta mai. Ka naupan lai hian zai hi ka tui em em ka hre lo, a chhan chu zai thei tur hian ka aw hi a tha tawk thin lo va. Aw tham ti tek tuak mai hi a ni a, a chhang hma em em bawk a, ka zai ngai lem lo. Sunday School-ah kan zirtirtute'n ka nu leh pate an zai thin avangin, zai ve thei turah min ngai a, zai turin min han ruat ta a. Ka zai hmasak ber tum hian tu man ka zai ri an hre thei lo, ka zak bawk si, zaithiam chu sawi loh ka zai thei lo hrim hrim bawk. Chumi hnu tho chuan engati tehreng nge maw ni

kan zirtirtute tho chuan zai turin min ruat tha leh a, hemi tum hian ka pa chuan 'Zai vak mai rawh, i nu leh pate kan zai thin a, i zai ve thei ang,' a ti a, hemi tum hi chuan ka zai ring tawh hle. Ka pa thusawi ho te mai leh kan zirtirtute thu kha ka zawm ta a, vawiin thleng hian ti hian ka zai ve ta reng mai chu a nih hi. Ka bul tanna hi ka ngaihtuah thin a, zai han zira han tih em em ka nei lo, min zawh pawh hian 'Sunday School chhuak' tih bak chuan chhan ngaihna vak ka hre lo.

Tleirawl chawhnu inkhawm a zai thin kha KTP-a Branch programme-ah te ka zai ve zel a, hun a lo kal zel a, ka aw chak vak lo ka tih pawh chu khatia kan zai kan zai takah khan a rawn pawp ta ang hian a awm a, aw chhang leh hrawk na te kha a rawn reh ta ringawt baw a, duhtawka group vela kan han zai phei kha chuan khap daih ngai kha ka ni ta fo mai zawk a.

Tumkhat chu Vana Pa Hall-ah khian zai tur zingah ka tel ve a, kum 2004 kha a ni. Chumi tum pawh chuan huphurh tak te hian ka huphurh a, ka zaipui turte kha Mizoramah chuan a top thiau mai an ni a. Ka pa bawkin zai

tura ka kal hma chuan, "I theihpatawpin, i thiam dan berin zai tawp rawh," min ti a, kan in atang chuan ka cousin nen kein Vana Pa Hall pan chuan kan han kal chho ve ta hnak hnak a. Mak deuh mai chu, khami zan khan ka hla sak Four Days Late kha Pathianin nasa takin a hmang a, mi dang aia ka zai that em em pawh keimah chuan ka hre lo nain damna chang te, testimony tha tak te an chan bakah, miin ka zai an hriatna rahbi pawimawh tak a lo ni ta a ni.

Thu hi ka awihna chin apiangah malsawmna ka dawng thin a ni tih hi ka hria a, a vai chuan ka awih lo nain thu awih mi tak chu ka ni vein ka inhria. Pathian thu pawh hi rawngbaw tura kohna hi a hranpain ka dawng lo va, keimahah min rawn deng dawttu pawh a awm chuang lo, chhungkua leh Sunday school zirtirna atangin ka ring mawl ve tawp. Ka rinna chhan em em pakhat chu – ka rin Pathian hi a rinawm tih hi keima nunah a chian em vang a ni. Intum chawp Pathian a nihna hi ni tin a tharin ka hmu zel thin.

Hun a kal zel a, solo aţang chuan zaipawlah kan tel leh a. Bial Zaipawl ka telna hmasa ber hi Dawrpui Vengthar Pastor Bial Zaipawl a ni a. Hemi ţum hian zaipawl induction ka tel hman ţawk a, ka chhungte chuan solo-na tur programme ka ngah tak em avangin phat mai a ţha an ti a. Zaipawl member zingah ka ţhianta an tam avang khan nuam ka ti em em a, mittui tla chungin phatna lehkha hi ka pe a, ka nu leh pate hi ka ngei deuh rum rum bawk. An thu ka awih lo ngam bawk si lo. Khang hun lai khan ka rilruah chuan hetiang a Bial Zaipawl pha chu nakinah pawh chance eng mah ka neih tawh loh ka ring a ni. Solo-na tur programme ka ngah bawk si, a pahnih khan ka ti kawp thei lo va, ka pha ta kha a ni a. Tuikual Bial kan han indang chiah kha Bial Zaipawl member atan min han la leh a, Pathian zarah term hnih aia rei ka tel leh thei a, chu mai bakah hemi hnu hian TBZ Choir-ah leh Mizoram Synod Choir-ah Pathian khawngaihna avangin ka tel ve leh ta zel a ni.

Zaipawl leh Group rawngbawl naa ka telnaah hian mi dangte ringa, mi zara

tih ve satliah hi ka duh ngai lo. Ka tel rau rau a nih chuan zaiah pawh zai lovah pawh, mi rin tlak ka ni tur a ni tih hi keimah leh keimah ka infuihna a ni ţhin.

Mizoram Synod Choir- a ka tel khan a boruak a dang khawp mai, ka lo ngaihshan leh ka telna atan chuan a sang mah mah em aw ka lo tih ţhin kha a ni a, a tension pawh a sang hle mai. Chutah kan lut fel chiah maw tihah kan Zaipawl Conductor-in ka part sak ngai reng reng loh Contralto sa turin min han ti mai chuh...kar khat chhung kha chu ka mu ţha thei lo, ka mut pawn ka mu nghet thei lo, ka phu zuk zuk zel! Huphurh tak chung chuan kan ti ve naw naw a, thu awih hi ka tih tur a ni tiin keimah ka inhrilh ve reng tho bawk a; tin, ka ţhian hnaivaite'n ţha takin min fuih ve bawk a. Kan term a lo zawh meuh chuan kan Conductor thu kha ka lo awih lo vang tih ka hlau ngawih ngawih tawh zawk. Kha part ka sak khan solo-a ka zai leh zelna turah nasa takin min pui a lo ni reng a, ka beisei loh dan deuhvin Pathianin rem min lo ruatsak reng a lo ni zawk a ni tih ka hriat phah a ni.

Zai ringawt lovah pawh, zirna leh ei zawwna kawngah pawh hian thu ka awih avanga malsawmna ka dawn leh thu ka awih loh avangah malsawmna ka dawn tur ka dai buak tak tam tak a awm a, sawi vek sen a ni lo vang.

Tunlai khawvelah thalai tam zawkte'n thiamna leh zirna sang zawk te kan zir a, kan khawvel a lo changkang ta hret hret a, kan nu leh pate, kohhran leh thalaia kan hruaitute hmu tling lo ta riau kan awm ta zeuh zeuh mai. Heng kan nu leh pate leh kohhrana hruaitute hi kan lei Pathian an ni tih kan hriat nawn fo hi a van han tul tehlul em! Kan hmuh theiha mite thu mah kan awih theih

loh chuan hmuh thei loh phei chu kan zawm dawn lo tih a chiang reng. Nu leh pa thu awih hi dam reina a ni a, zirtirtute thu awih hi zirlai tan hlawhtlinna a ni. Pathian thu zawm miah lo leh a thu anga nung si lo hian rawngbawlna kawngah hian a kal ve theih a, inthawina te pawh a hlan ve theih vek tho. Mahse, chu chu Pathianin a pawm lo. Pathian thu zawma, a thu awihna nena rawngbawl zel thei turin kan nun i buatsaih thar ang u.

'Fapa meuh pawh ni mah sela a thil tuarahte chuan thu awih a zir ta a ni; tichuan, tihthat famkima awmin, a thu awih zawng zawngte tan chatuana chhandamna bulpui a lo ni ta' (Heb. 5:8-9).

DIAMOND JUBILEE SAWMNA

Hmunhmeltha Branch Kristian Thalai Pawl chuan November 22-25, 2018 chhung hian kum 60 tlin champha (Diamond Jubilee) kan lawm dawn a. Hmunhmeltha Branch K&P member lo ni tauh zawng zawngte he hun rawn hmang tur hian kan sawm che u a, lo kal ngei turin kan ngen a che u.

K&P, Hmunhmeltha Branch



*The great Apologist
of our time*

Evangelist lar Chuck Colson-an “*The great apologist of our time* (Tunlai khawwela rinna vawng-himtu ropui)” ti hiala a sawi Ravi Zacharias hi March ni 26, 1946 khan Chennai-ah a lo piang a. Kum li chauh a nih laiin Delhi-ah an pem a. A pa hi sawrkarah hna pawimawh tak chelh a nih avangin a buai thei hle a. A fate tan pawh hun a nei mumal thei meuh lo. *Nottingham, England*-ah an post avangin Ravi-a phei hi chu kum khat a tlin hnuah a hmu thei chauh a ni.



Kristian chhungkuua sei lian chu a ni ve na a, a nu leh pate hian an fate bulah Pathian thu an hrilh ngai lem lo. *Krismas* leh *Good Friday*-ah an inkhawm ve tawh a. *Hindu* emaw, *Muslim* emaw ni lovin, Kristian tia koh an ni tih zawng chu Ravi hriat chian chhun chu a ni.

Rawlthar a ni a, mal riauva inhriatna, mahni inkhaw-

ngaihnain a khat a. A zirlaiah a tui lo va, engtin tin emaw a inham kai ve hram hram zel a. *University* a kal hnu phei chuan a pa mit a tlung lo thei em em mai a, a pa hauh pawh a tuar nasa thei hle.

Ni khat chu Ravi-a farnu te chuan *YFC (Youth for Christ)* rally awm turah kal ve turin an sawm a, a ngaihsak

lo hle. *"Refreshment a awm dawn asin,"* a'n han tih chuan, ei leh in duh tak mi a lo ni bawh nen, a bengkhawn ta chauh va. *"Eng nge an sem dawn?"* *"E le! Thil tui tak tak maw le!"* Aa thianpa, a makpa ni bawh chu sawmin rally-ah chuan an tel ve ta a. Mahse, ei leh in chu a tel ta hauh lo va, a lungawi lo hle.

Chu rally-a YFC President, Sam Wolgemuth-a'n Johana 3:16 a sawi lai chuan a nunah danglamna a rawn thleng ta tlat mai le! Chutah zaithiamin *"There is balm in Gilead (Gilead-ah damna a awm)"* tih hla a rawn sa a, chumi lai tak chuan Sam-a chuan sawmna a siam ta a. Pathianin a khawih ngei niin a inhria. Rally an neihna auditorium lum uap churhah chuan mi sang chuang an thu khat tlat a, chung zingah chuan amah chiah chu sawmna chhanga, maicham va pan chu a ni. Mi pakhat Ben Wylie chuan a lo dawng-sawng a, *"Eng vangin nge hetah i lo kal?"* *"Kha pa neih ang kha ka duh ve,"* tiin, a thutlukna ngaihsan hmel lem lo takin Ravi-a chuan a chhang a. Chhunggrilah erawh chuan thlarauvin hna a thawk ni

ngeiin a hre tlat a, sual nia inhriatna lian tak a nei a ni.

Thla tam a liam a, a rilru a buai tulh tulh a. Ni khat chu a rilru hah lutuk chuan an university laboratory-a mi tur (poison) a hawn a. Rilru mumal a pu thei tawh lo, a beidawng ngawih ngawih mai a ni. A tukah chuan an pindan bual inah lutin, kawngka a inkhar hnan a, a tur hawn chu tui nen chawhpawlhin a in fai ta vek a. A thil in avang chuan a luak nasa hle. Kut silna tlang vuanin amah pawhin a ding zo ta mang lo va. Thei leh thei lovin a te chhuak a, chu chu an awmpuipa chuan hriain, kawngkhar tichhiain a buaipui thei ta hlauh va.

A harh leh meuh chuan damdawi inah a lo awm tawh a, hriau chi hrang hrang a taksaa invit bur fur chu a hmuh hmasak ber a ni. A nu chu a kiangah a lo ding reng a, a pa chu kawngkaah a rawn dak a. Ravi-a chuan a pa rilrua ngaihtuahna awm tur zawng zawng te, an chhungkaw hmingchhiatna a thlen tak te a ngaihtuah a, hrehawm a ti em em mai a. A nun beidawn

avanga thih a tum lahin a thi thei baw k si lo. Daktawr pawhin a kawchhung a tihchhiat nasatzia sawiin, thu lawmawm lam sawi tur a van hle. A nu chu lungchhe takin a ñap chhuak a.

Chutih lai chuan pa pakhat hi, *"There is balm in Gilead (Gilead-ah damna a awm)"* tih hla ngei mai sain a rawn lut a. Chu pa chu pastor niin Ravi-a chu Bible a rawn pe a. Johana 14:19, *"Keimah ka nun avangin nangni pawh in nung ve ang,"* tih thu a chhiar zet chu, a nun chu a hneh ta em em mai a. Bible nei lo, a chhiar pawh la chhiar ngai lo a ni na a, tu ma hrilhfhia a mamawh tawh lo. *"Hei ngei hi ka beiseina awm chhun a ni,"* tiin Pathian hnenah a inhlán thar leh ta a ni. *"Lalpa, nang chauh hi i ni, nun dik pe thei tu chu. He damdawi in atang hian min la chhuak la, thutak ka zawn hmuh hma chu theihtawpin ka bei ang,"* tiin. Ni nga hnuah chuan Wellington Hospital, Delhi atangin Ravi Zacharias chu dam takin a chhuak a, nun thar neiin mi thar a lo ni ta.

Kum 1966-ah an chhungkuain Canada-ah an

pem a, Ontario Bible College atangin kum 1972-ah Undergraduate degree leh Master of Divinity, Trinity International University atangin a zir chhuak ta hial a. Vawiin thleng hian Delhi a kal chang chuan Wellington Hospital kawtahn ding, *"He lai hmuna hian a ni, Ravi Zacharias-a hnenah Bible pe turin Pathianin mi pakhat a rawn tirha, danglamna a rawn thlentirna hmuna ngei chu,"* tiin Pathian chhanchhuhahna a chan a inhrilh nawn leh ñhin. Sam Wolgemuth-a khan YFC Rally-ah khan Pathian thu sawi lo ta se, tun dinhmuna hi a thleng kher lo vang le. Mi sual ñawngñaina chu chhanin a awm a, a nun thlak danglamin a awm ta a ni.

May 1972 khan Margaret *"Margie"* Reynolds nen kohhran ñhalai thiltihnah an intawng a, ani nen chuan inneiin, fa pathum – Sarah, Naomi leh Nathan-te an nei. Ravi Zacharias hi Canadian-American Christian Apologist lar tak a ni a, Kristian lehkhabu tam tak a zia k tawh baw k. Ravi Zacharias International Ministries dintu leh chairman a ni a. Doctoral degree 6 lai a nei nghe nghe.



"Vânram chu anţam chi fang khat miin a lâka, a lova a theh ang hi a ni. Chi azawnga tê ber a ni a; mahse, a lo ŧhan sân chuan thlai dangte ai chuan a lo lian a, thing a lo ni a; chutichuan, chunglêng savate an lo kal a, a zârahte an riak ŧhîn."

(Mt. 13:31-32)

Phengphehlep hi Pathian thil siam zinga mawi ber leh mit la berte zinga mi tiin kan sawi thei awm e. A thlaa rawng chi hrang hrang in pawlh leh boruaka a phe help hlep hian mihring mit a lain, mawi tih a hlawh a. Hei vang hian thil mawi leh nuam entir nan mihringte hian kan hmang fo va. Nungcha zinga derdep berte zinga mi niin, pianhmang mawlmang, zang tak leh te reuh te ni mah se, Pathianin a thla chu rawng chi hrang dangdai takin a khuh a, mihringte suangtuah thiam baka mawiin a duang bik tlat a ni.

Thil siam zingah chuan phengphehlep hi chhin-chhiahna leh entirna (*symbol*) atana hman nasat ber pawl a

ni a. Thih hnua mihring thlarau te, malsawmna te leh mihring nun inthlak danglamna leh piantharna lam entir nan te an hmang fo a. Kristiante rinna kawngah pawh phengphehlep ŧhan dan chhawng thum – pangang, buhchium leh phengphehlep puitling hi – Isua thihna, thlan leh thlarau nun thar tehkhin nan an hmang a, *Easter* bawr velah phei chuan an sawi uar hle ŧhin a ni.

Heng bakah hian science leh arts lam zirnaah pawh phengphehlep leh a nun phungte hi tehkhin nan an hmang zel a. Chutiang zinga lar deuh ber chu Edward Lorenz, University Professor-in, a khawchhin thlir lawkna

tur a zir atanga a hmuhchhuah, Chaos Theory, "Butterfly Effect" a vuah hi a ni. A sawi fiahna tlanglawn ber chu 'Phengphehlep, nungcha derdep tein a thla, zang tak mai a zah hian rin phak aia nasain nghawng a nei a, boruak dang daih a her chhuahtir thin' tih hi a ni a. He phengphehlep thla zap hi zirna peng hrang (economics, business, psychology, history)-ahte tehkhin thua hian hmang baw.

"New Mexico-a phengphehlep thla zapin China rama thlipui tleh a nghawng daih thei," tih chu tawngkam lar tak a ni ta a. Phengphehlep thla zap chuan beisei lohte chu beisei tur tih thu pawimawh tak a ken tel tlat avangin, khawchin thlirna a ni emaw, sumdawwna a ni emaw, mihring rilru ngaihtuahna pawh ni se, thil te reuh te, pawimawhna nei lova kan hriatte hi buaina thlentu leh thil danglam kengtu a ni daih thei tih kan hriat reng a pawimawh.

Phengphehlep thla zap hi KṚP member-te pawh hian kan ngainepin, eng tham mah a ni lo tiin kan hlamchhiah fo

thin. A bik takin soal langsar lem lova kan ngaih, soal a ni tih pawh kan ngaihtuah loh, thil ho te hian kan inrin hmam min timualpho va, min tichhe fo thin.

Mihringte hian mahni inrin tawka kan nei loh vang te, kan indah hniam vang te, kan zah vang te, kan rinna a chak tawh loh vang tein, thil tha tih kan duh ve te hian mite ngaihah leh Pathian hmaah eng tham mah a ni dawn lo tlatin kan hre thin. Hei hian kan hmasawwna tur a tiṭhuanawp a, kan thlen theih chin kan thleng zo lo va, mi tana malsawwna ni tur pawh kha engmahlovah kan chantir fo. KṚP activity leh project tam tak pawh sawt lo leh hlawk lo riauva hriatna a awm thin. Member tam takah phei chuan nghawng nei pha ve lo leh thawk sawt lo riauva inhriatna a awm a, rawng-bawl na a ngaihneptir a, KṚP ngaih pawimawh lohna a siam thin. Mi thiam zawkte'n an sawi anga phengphehlep thla zap mai maiin khawvel lehlahmah nghawng a nei theih chuan, phengphehlep thla zap ang deta zawi pawh ni se, tim lova ke kan pen chuan hma kan sawnin, kan

rin phak bak leh beisei loh, thil ropui zawk leh nasa zawk pawh kan thlen thei a ni.

Thil ropui tak ai chuan, thil ho te hian mite thinlung a hneh zawk tlat chang a tam a. 'Tlem te a tawh, pen khat pawh ni mah se,' tih hla ang khan, Pathianin kan theih tawh bak min phut lo. Mi pakhat tawngtainain thil nasa tak a ti thei a, zan khat lek inkhawm tura kan sawm kha a sawt a, zan tin a hriat miah lohva kan tawngtaisak thin kha chhanin a awm fo. Bible chang khat kan chhiar kha mi tan damna leh malsawmna thlentu a ni thin. Rawngbawltu leh active

member-ah min chhiar lo mai thei; mahse, phengphehleph thla zap phe zeuh ang chauh pawha kan chet ve det chuan eng emaw a thleng ngei ang. Kan theihtawkah Pathianin 'Te lua a awm lo,' a ti a, 'Pen khat a tawh' a ti fo thin.

Zirtirte chu a hnênah a fâlin an lo kal a, "Eng vângin nge keinin kan hnawh chhuah theih loh?" an ti a. Aní chuan an hnênah, "In rinna a tlêm vâng a ni. Thu dik ka hrilh a che u, an tam chi fang khat ang rinna in neih chuan, he tlâng hnênah hian, 'Heta tang hian sawtah sâwn insawh rawh,' in ti ang a, a insawh mai ang. Tih theih loh rêng in nei lo vâng."

DIAMOND JUBILEE SAWMNA

Ruantlang Branch Kristian Thalai Pawl chuan November ni 5-8, 2018 chhung hian kan branch kum 60 tlin champha (Diamond Jubilee) kan lawm dawn a. Ruantlang Branch KCP member lo ni tawh zawng zawngte he huna tel tur hian kan sawm che u a, lo kal ngei turin kan ngen a che u.

KCP, Ruantlang Branch



Health Tips

Junlai thalai zingah thih thut thut a tam hle. Hei hi a chhan ber nia lang chu kan hriselna kan ngai pawimawh tawh loh vang niin a lang. Kan taksa hi Pathian In a nih miau avangin keini KTP member, Amah ringtute hi chuan kan ngaihthah a thiang lo. Pathian In venpuia, taksa hriselna kawnga hma kan sawn theih nan heng kan han thai lante hi zawm tum ila a duhawm hle mai.

1. Stretching : Zing thawh veleha stretching tih thin hian kan thisen kal vel a titha a, ei leh in pai tawih kawngah nasa taka min puih bakah hnungzang nate pawh a ti ziaawm thei hle a ni. Stretching tih dan tha chu taksa theihtawpa tihfan/mar kuala, chutiang position chuan second 25 vel tal awma, boruak a tam thei ang ber hip luh thin tur a ni.

2. Tukthuan thlah loh : Mi thiamte'n an zir chiannaah chuan, tha tak leh mumal taka tukthuan ei hian rihna tihtlakhniam tumna kawngah nasa takin a pui a ni an ti. Thau paih duh vanga tukthuan ei loh chingte hi an thau belh duh an tih tlat chu. Tukthuanah chuan heng – thei chi

hrang hrang leh theitui te, Fibre pai tam thlai te, dhoi, wheat atanga siam eitur thil leh artui chhumte ei a tha.

3. Ha nawh uluk : Ha nawh dan dik hi tam tak hian kan hre lo fo. Ha nawh dan dik lo leh uluk loh avangin ha leh hahniin an tuar phah fo thin. Tam tak chuan ha hi kan nawt rei tawh lovin kan thuah fai tha tawh thin lo. Toothbrush hi pen hum anga hum tur a ni a, ha, hahni, lei leh ka chung zawng zawng fai taka nawtin, minute hnih chung tal nawh thin tur a ni.

4. Tawngtai fo : Harvard University-in damlote a zir chiannaah tawngtai fo thinte hian an tawngtaina ring lem lo mah se, tawngtai ngai loho aiin an dam chak zawk an ti.

5. Thlai rim na ei thin : Thlai rim na, heng – purun, purun var leh purun hnahte hian taksa tana chaw tha tam takan pai avangin ei tam a tha. Cape Town-a Child's Health Institute-in a zir chiannaah chuan purun var hel ei hian naupan laia natna kan vei thin tam tak dona kawngah a pui nasa hle a ni an ti.

6. Ruh tichak rawh : Mihring hi kum 30 kan tlin hian kan ruh hian a chakna a hloh tan thin niin an sawi. Ni tinin kan taksa hian mg 200 tal calcium a mamawh a. Chuvangin, ruh tichak nan calcium tamna chaw tha eng emaw zat bawngnhnute emaw, dhoi/lassi emaw ni tin ei a tha.

7. Berry lam chi ei tam : Strawberry, Blueberry leh raspberry-ho hian taksa tana tha 'antioxidants' tam tak an pai a, chu chuan lung natna hrang hrang leh cancer lakah min veng thei a ni.

8. Herbal Supplements : Tunlai hian herbal damdawi hrang hrang kan ei nasa ta hle. Heng hian thisen chhuak a tihtam zual theih avangin inzai dawn hma kar hnihah tal thlah a tha a, kan ei thu pawh doctor hrilh ngei a tha bawh.

9. Tomato : Tomato hi thlaiah chuan a thatna tam ber pawl a ni awm e. Tomato hian 'Lycopene' an tih tam tak a pai a, chu chu cancer natna dotu chak em em mai a ni. Tin taksa tana tha Vitamin C tam tak a pai tel bawh. Tin, zir chiannaah chuan tomato leh apple hian asthma leh chuap natna hrang hrang lakah min veng thei a ni an ti.

10. Vitamin C : Kan taksa hian ni khatah Vitamin C hi mg 90 vel a mamawh a; chuvangin, vitamin C tamna thei chi hrang hrang wawi 5 vel tal ni khatah ei thin rawh.

11. Folic Acid : Folic Acid hi raipuar leh taksa chak lote'n regular taka ei thin tur a ni. Hei hian naute hriselna mai bakah cancer natna dona kawngah a pui a ni. Folic acid hi thlai hnah hring, sa thin, thei leh thlai chi ei thinhovah a tam hle.

12. Vitamin A : Vitamin A hian taksa ral do khawl nasa takin a pui a, sentut natna tihtam kawngah pawh a tangkai hle. Chuvangin, Vitamin A pai tam, heng – sa thin, bawngnhnute leh bawngnhnute atanga thil siam, thlai hring, hmarcha leh palm oil te hi ei tam a tha hle.

HRUAITUTE CHANCHIN

Tv. Robert Lalduhzuala

Editor, Kristian Thalai



Tv. Robert Lalduhzuala hi Pu K. Thanglura leh Pi B. Lalramengi-te fa pathumna ni turin April ni 25, 1984 khan Aizawl Civil Hospital-ah a lo pianga, a pian hnu lawk hian a nu hnathawhna avangin Champhaiah chhovin Champhai Kahrawt Veng Biak Inah (Tuna Champhai Vengsang Biak In) Rev. Lalramliana'n baptisma a chantir a, kum khat vel Champhaiah awmin Aizawlah a sei lian ta a. Unau mipa 2 leh hmeichhia 2 neiin, tunah hian Ramthar North-ah an cheng mek a ni.

Zirna lamah Ramthar Veng Primary School II-ah zirna bul òanin, Ramthar Veng Middle School-ah a chhun-zawm a, High School hi Republic Higher Secondary School leh Pianghleia High School-ah a kal a, Class XI leh XII hi Special Hindi School, Venghlui (MICEd) àtangin a zo leh bawk. Pachhunga College àtangin a graduate a, Mizoram University àtangin M.A. Psychology a zo leh bawk a ni. Christian Counselling Centre, Vellore-ah Counselling course te a kal ve bawk. Tichuan, MA a zawh hnuah sumdawnna lamah a kal ta thung a, tunah hian an chhungkaw sumdawnna 'Lura Traders' a enkawl mek.

Rimawi lamah sulhnu a lo nei ve nual tawh a, audio album pahnih a siam ve tawh a ni. College level leh ram pum huap intihsiaknahte pawh lawmman a lo la ve tawh òhin a, chumi hnuah a òhianta nen inkawp chhovin Zoram chhung leh pawn hmun hrang hrangah concert leh zaia rawngbawlna te an lo nei kual ve tawh òhin bawk.

Infiamna lam hi a ngaina ve hle a. Central Committee-a a member-puite ang bawkin, hlawhtlinpui tham tak tak si lo hian hockey, cricket àtanga basketball, football, etc. thlengin a khel ve tawh òhin a. Tunah erawh òang taka entu nih nuam a ti ta zawk.

Rawngbawlina lamah hian naupang te a nih aṭanga phak tawka Biak In hnaih ve tlat ṭhin a ni a, Sunday School lawmman Pi Zaii Medal te pawh a lola ve tawh a ni. KṭP member rual a nih tirhin KṭP-ah inhmang ve nghalin, a inpek kum aṭangin sub-committee-ah te a tel ve nghal a, zaipawl leh zaia rawngbawlinaah phak ang tawkin ke a pen ve ṭhin a ni. KṭP-a a inhman vanglai takin beisei loh lamah kum 2002/2003 vel khan khawvellam hla a sa ve ta tlat mai a. Rawngbawlina nen eng emaw chen chu han ti kawp mah se, a lo kal kawp rei thei hauh lo mai a, rawngbawlina lam pawh hun eng emaw chen chu a pensan ta nghe nghe a ni.

Amaherawhchu, a chhung te, KṭP member-pui te leh kohhranhote ṭawngṭaisakna azarah Pathian khawngaihna changin, kum 2004 June thla khan Pathian hnenah a rawngbawl tura inhlan thar lehin, chuta ṭang chuan tun thlengin rawngbawlina peng hrang hrangah a phak ang tawkin a inhmang ve ta zel a ni.

Tunah hian Central KṭP Committee 2018-2020 term-ah committee member atan thlan

ni lehin Kristian Ṭhalai chanchinbu Editor a ni mek a; tin, kum 2017-2019 chhung atan PYF editorial board member a ni mek baw. Ramthar Veng Bial a din tirhin naupang tein Bial hruaitute zingah a tel ve zel a, Branch-ah pawh OB post hrang hrang te a lo chelh ve tawh a ni. Tunah hian Ramthar North Branch Asst. Leader a ni mek a, Bial KṭP ah ex-officio member a ni baw. Ramthar North Kohhran Senior Department Leader a ni mek a, Naupang Sunday School-ah General Secretary niin, committee peng hrang hrangah chanvo a chelh ve nual baw a ni.

Pathian hlaah hian *‘Isua neih ka duh zawk, ro hlu ber aiin’* tih hi a duh hle a; *Johana 3:16* hi a Pathian thu ngaihhlut leh duh em em a ni baw. KṭP member-te hi khawvel laka kan dinna tichiang ngam tur leh Kristian ṭlangval/nula ni ngat ngam turin min sawm a, Krista leh a kohhran tana ding ngheta, ṭan ṭlattu leh sawichhiatna aia a chhung aṭanga siam ṭhatu nih a hlu zawk tih vawng tlat turin min chah baw a ni.



VANRAM ROPUIAH

- T. Laldintluanga
Conductor, Mizoram Synod Choir

He hla hi Kum 2017 April thlaa ka phuah a ni a. Hun eng lemaw chen aṭang khan rawngbawltu piangthar, thih hnu piah lam ram beisei tur nei inti chung sia vanram ka ngaih khatzia te, khawvel thila thlakhlelh tur in leh lo emaw, sum leh pai kalsan uiawm khawp nei lo mah ila, thi tura ka inui thin sizia te ka inngaihtuah fo thin.

Isua Krista hnung zui inti ve sia a hmel hmu tura vanram kai erawh ka chak tawh loh thinzia te hi ka ngaihtuah fo va. Khawvel thiamna hmanga siam ka smart phone mai pawh hi Isua aia ka thlakhlelh tum a tam hian ka hre thin. Heng zawng zawng hi ka ngaihtuah chian chang chuan ka ringtu nun min vaw let fo mai.

He hla pian ṭanna hi Synod Choir hla zirna kalkawng a ni ve tlat a. Mi mala harsatna neuh neuh nei chungin ni dang ang lo takin phur vak lo hian kan veng Ramhlun North aṭangin kan hla zirna hmun panin ka scooty-in ka tlan phei a. Phur vak lo chung a kal tih takah, hemi ni hian kan hla zirna

hmun chu a hla ka ti kher mai. Kan hla zirna hmun hi Aizawl veng laili deuhva sawn dan te hi a awm lawm ni le, tih thlengin ka suangtuah phei nghe nghe a ni. Kawng chanve vel ka tlan tawh mai thei e. He hla thunawn tawp lam, *"Hmangaih vanga ka Lal hmel hlaiam hnu kha, lawmna mittui far chungin ka kuangkua ang,"* tih lai hi ka rilruah a rawn lut ta thut mai a. A thluk, tuna mi chiah hi ka rilruah awm tel nghalin he lai chauh hi ka rilru chuan ka sa phei ta a.

Vanram ka ngai ta em em mai a. Mitthlain min hman ngaih em vanga ka tana tuartu Isua hmel duhawm, keimah vanga an vuak, an khen beh ngei mai chu lawm avanga bianga mittui far zawih zawih chung a pawm

vawng vawng tur ang hian ka inchan zui ta a. Ka lung a chhe hle nghe nghe a ni.

Ka chung a hrehawmna te, natna te, chungpikna lo thleng thin zawng zawng te hi thlen hmabak vanram min ngaihtirtu atana Pathian hmanrua a lo ni dawn reng mai tih te rilru ah a lo lang zui a. Nakina ka lawmna tifamkintu tur leh tunlai tawngkam takin *confi* taka lawm chung a Lalpa hmel ka hmuh theihna tur a lo nihzia te ka ngaihtuah zui a.

Tichuan, kan hla zirna hmun ka thlen chuan a chang khatna leh thuawn, ka rilrua awmte chu theihnghilh hman hlauvin ka phone-ah mi hriat hlau takin a ruvin ka record ta a. Chumi kar tuan chuan ka rilruah vanram ringawt mai chu a awm tak avangin, remchang hmasa bera hla atana siam chhonzawm ka rilruk ta a. Heti hian kan chhonzawm leh ta a: *"Theihtawka rawngbawla kawng dik zawh tum pawhin, sawichhiatna, mualphona a lo thlenga; ka chhungril a rum thin, i rawngbawl a har fo thin, chawlhna nuam vanram khi ka ngai zual thin,"* tiin ka'n phuah chhonzawm leh a.

Ka hun tawn tawhte ka chhui let ta a. Theihtawp chhuaha rawng ka bawl ve lai te, ka chet fuh ve riau lai te, thleng sang ve viau emaw, che mawi tawh ve viauva ka inngaih laia lehlam atanga sawichhiatna leh mualphona lo thleng thin te, rawngbawl-na phat duh rum rum khawpa mi mal leh chhungkua harsatna ka tawhte kha a va han na thin tak e aw! Mahse, a lo va hlu si em!

Thlen hmabak vanram ka thlir fo theih nana Pathian remruat a nih ka lo pawm thiam ve ta. Synod Choir-a ka tel tirh phata in luah tur zawnga mangang taka chhungkua kan awm lai te, ka nu leh paten hun inhnaih te teah damlohna an han tawh ve a. Biak mumal theih lohva an han awm lai tea ka thlaphanzia te kha. Sum leh pai lama harsat zual laia, tu ma hriat lohva ka nupui fanaute mut reh hnua anmahni tana ka tlin lohzia ka inngaihtuah chang te khan thlan a sa ve bat bat a. Mutmu pawh tuah tha theih lova ka awm lai te kha aw! A va hrehawm thin tak em! Mahse, heng harsatna zawng zawngte hi Pathian min

ngaih zualtirtu, vanram thlen min nghahhlehtirtu tur hmanrua a lo ni reng si. Ka duh ang angin awm thei ni ila, Pathian khi ka ngai dawn si lo tih zirlai min zirtirtu a lo ni a. Famkim lohna khawvel hian chung lam vanram kan famkimna tur hmun khi min ngaih zualtir a. Hmabak hmuh lawk theih loh vanram beisei thin ringtu ka nihna hian chawl lova thawk zel turin min tichak a lo ni reng mai tih te min hriat chhuahtir ta a, ka lawm em em a ni.

Rawngbawlinaah pawh Lalpa chhiahhlawh, chet that chang nei, chet fuh loh chang pawh nei fo thei, mi fak leh fak lohva danglam mai mai tur ka lo nih lohziat ka man thiam ve ta a, min tilawm thar em em a ni. A chang tawp ber atan chuan, *"Vanah khian ringtute kan par vul ve ang a, min hruai dawn, kawngkhar mawi khi kan pan ang. Ka chan tur ka dawn thin, thlarauvin ka tem lawk thin, rinnain chu hmun chu ka thlir fo thin,"* tiin.

Kan phuah chhunzawm leh a. Ringtute hian vanah chauh ni lo, leiah pawh vanram kan lo tem lawk thei a. Malsawmna pawh Pathian zarah kan dawng ve thin. Mahsela, kan par vul tak

takna hmun tur leh mal-sawmna leh thil tha zawng zawng, chawimawina lallukhum kan khum vena hmun tur erawh vanram khi a ni tih te rilruah a lo lang a. Chu hmun nuam, kan par vul vena hmun tur chu ka suangtuah a, thlarauvin a nawmna leh ropuina chu ka tem lawk hial thin. Khawvel hlimna aia ropui zawk vanramah khian a awm ngei a ni tih rinna he hla ka phuah a tang hian ka nei thar nasa ve hlein ka inhria a, min tilawm em em a ni.

Ringtute kan vanneih bik em emna chu vanram beisei tur kan nei hi a ni a. Johana 14:2-ah chuan, *"In tan hmun siamin ka kal dawn hi. Tin, in tan hmun ka han siam chuan ka lo kir leh ang a, ka hnenah ka la ang che u,"* tia Isuan ringtute tana vanram min siamsak thu a sawi hi rinna nunga thlir mai tur ka lo nihziat ka hre thar a. Chu hmun kan thlen hun chuan chhandamtu'n min lo hmuak ang a, lungngaih, natna, thihna vang ni tawh lovin lawm avang zawka mittui far chungin, amah ngei chu kan la hmachhawn dawn a ni, tih ring chung leh beisei chungin he hla hi ka lo phuah chhuak ta a ni.

AWARENESS 2018

KTP General Conference rorel Zu, ruihhlo leh a kaihhnawih, HIV/AIDS darhzau zel lohna tura CKTP-in hma la tura tih angin CKTP chuan ruihhlo leh a kaihhnawih sub-committee a din a, CKTP leh Synfo tang kawpin zu leh ruihhlo darhzau zel tur venna, *Awareness Campaign Programme 'AWARENESS 2018'* chu November ni 16, 2018 hian Vana Pa Hall-ah a buatsaih dawn. Bial tin aiawh mi pakhat theuh intirh a ni ang a, he programme-a item zawng zawngte hi Awareness lam hawi ni tura beisei a ni. *Awareness 2018 programme DVD* hi branch tinte'n an lo chhawr tangkai theih turin a thlawna pek vek a ni bawk ang.

Programme Tlangpui

A hun	: November ni 16, 2018 (Zan dar 7:00)
A hmun	: Vana Pa Hall
1. Zaipawl	: Mizoram Synod Choir & Presbyterian Choir, Lunglei
2. Solo	: <i>Tv. Andrew Laltlankima, Kolasib</i> <i>Nl. Laldusaki, Durtlang Br.</i> <i>Nl. Ruth C.VL. Muanpuii, Dawrpui Vengthar Br.</i>
3. Trio	: <i>Praise On 2016 (Top 3)</i> <i>Tv. Zorinsanga Sailo, Ramhlun North Br.</i> <i>Nl. R. Lalrinmawii, Leitan Br.</i> <i>Nl. Cindy Lalthanpuii Pachuau, Tlangnuam Br.</i>
4. Live Band	: <i>Awareness 2018 – Band</i> <i>Praise On 2018 pakhatna</i>
5. Group Zai	: <i>Dam Veng Branch (Praise On 2017 pakhatna)</i>
6. Faklam	: <i>Ramthar Bial</i>
7. Skit	: <i>Tuikual Bial</i>
8. Mime	: <i>Chawnpui Bial</i>
9. Projection Dance	: <i>Bungkawon Bial</i>
10. Awareness Clip	: <i>Luangmual Branch</i>
11. Thusawi tawi	: <i>Rev. Dr. K. Lallawmzuala, Leader, CKTP</i> <i>Dr. R.L. Sanghluna, Synod Hospital</i> <i>Upa Dr. C. Lalhrekima, Mission Veng</i>
12. Testimony	: <i>Nl. C. Lalchhuanzuali</i>
Banna	: <i>Rev. B. Sangthanga, Exe. Secretary i/c CKTP</i>

NGAIHNAWM NGAIHAWM



9774196355

KTP inchhiarna hnunung bera member tlemna ber Bial, Buarpui Bialah hian Branch pahnih Buarpui leh Bungmun Branch awmin KTP member 46 an awm mek a. Branch pahnih awmna inhlat zawng hi km. 70 vel a ni a, an inkarah lirthei service a awm loh bakah kawng a chhe viau mai bawk nen, bial huapa programme neih hleih theih a ni meuh lo. Bial hminga chet a ñul chuan Pastor ñhuthmun, Buarpui Branch hian a ñul angin hma an la mai ñhin.

Bial hminga an chetna hrang hrang zingah Presbytery Inkhawmpuia Bial Zaipawl neih hi a hautak ber pawl a ni awm e. Ñum khat chu Presbytery Inkhawmpuia zaipawl nei turin Chawng-teah an zin a, chumi ñum chuan hmeichhe lamah member 3 chauh an awm a, chuti chung chung chuan a part kim thlapin an zai thei tho. Bial zaipawl member tlem ber an ni hial mai thei. Presbytery Inkhawmpuia Bial Zaipawl nei tur hian KTP member bakah nu leh pa zingah, zaipawla tel thei tur awmte sawmin, Pro. Pastor-in solfa a vai chang pawh a awm.

Kum 2012 añang khan Buarpui Branch hian Branch project atan missionary pakhat chawm a rel a. Heta ñang hian kum tin missionary pakhat an chawm ta zel a ni. Thla khata branch sum hmuh hi Rs. 1,500/- vel (Thawhlawm ip leh inkhawm thawhlawm) a ni a, an thla khat sum lak luh chanve aia tam daih missionary chawmna atan an hmang a ni. A bak branch-in a la chan vete chu project hrang hrang an duan te leh hmalakna dang atan ren taka hman a ngaih ñhin avangin KTP activity hrang hrang an neih ñhinah pawh ei leh in lamah an intuituah hlei thei meuh ñhin lo a ni.

Thawhlawm atanga sum hmuh chanve aia tam daih missionary chawmna atan pek chhuah a nih avangin a bak chu a remchan ang anga tuak chhuah a ngai. Inhlawhna tur erawh a vang hle thung. Kumin kum chawhma lamah khan blanket sua sum tuak a ni a, an duhthusama tam blanket suk tur an hmu nghe nghe a. A sutute erawh an indaih lo ngang mai. Bialtu Pastor meuh pawhin mawng hung hman bik lovin a sukpuì ngat ngat mai a ni. A sira lo thua, phone khawih mai mai tur awm ve ta lo chu, facebook leh whatsapp lamah hnatlang thlalak hmuh tur a vang raih zel mai.

Kumin KṯP General Conference, West Phailengah khan Buarpuì Bial hi quartet nei turin Central lam hruatute duhsaknain ruat an ni ve hlauh mai a. Hruaitute tan chuan a lawmawmna leh a huphurchawmna a intluk a ni deuh ber. Ram pum huap thalai programme lian bera Bial KṯP member tlemna berin chanvo an han nei thei tur chu thil lawmawm tak a ni; mahse, chumi ruala ngaihtuahna luah nghaltu

erawh chu, zai tur mi pali an inhmu thei ang em tih a ni. Bial hruaitute'n mawhphur tura Buarpuì Branch an ruat angin quartet-a tel tur chu an han inruat a. Theihtawpin inbuatsaih mah se, a huphurchawm deuh a ni ang, General Conference tan hma lawk karah pawh CKṯP hruaitute nen, 'Quartet aiah solo kan nei zawk mai dawn em maw ni le?' tiin an la inbe zak zak a ni. KṯP member 27 awmna branch atanga KṯP inkhawmpuì liana chanvo neih hi thil namai a ni lo, tawngtai fe a ngai!

Kohhran Hmeichhia nen Thawhtan zanah a inchhawk-in an inkhawm thin a, CKṯP atanga thupui zir tur leh ram pum huap tawngtai rual programme-te bahlah lovin an ti ve thei zel a. Chanvo erawh kum khat chhungin member-te'n an chang hmem hman thin khawp mai! Hruaitute'n inkhawm hruai, thupui hawn, zai hruai leh thusawi bakah inkhawm tantu chanvo thlengin an tih a tul thin. Mahse, KṯP-a inhman hi nuam an la ti reng a, 'member tlem' nih hi chhuanlamah an hmang ngai lo.



KANTU

Ramhlun Venglai Branch

Ramhlun Venglai Kohhran hi Ramhlun Pastor Bialin *Centenary Project* atan neiin November 25, 1990 khan kohhran puitlingah hlan kai a ni. Kohhran a lo indan takah chuan KṚP pawh din ve nghalin, November 26, 1990 (Thawḥṭan) zan khan Ramhlun Venglai Branch hi a lo pjang ta a ni.

Kum 2015 khan *Branch* kum 25-na (*Silver Jubilee*) chu ropui taka hman a ni a. Kum 2018-ah hian member 644 awmin, mipa 354 leh hmeichhia 290 an awm mek a, Kristian Ṭhalai chanchinbu copy 181 lak mek ni. *Branch Committee* (*Pastor, Pro. Pastor* leh Kohhran *Committee* aiawh telin) mi 31 an ni a, ṭhla ṭhar Thawḥleh zan hnahnung ber hi committee hun nghetah neiin ṭluang takin an la *committee* thei zel a ni.

Branch rawngbawlina a chak zawk nan *Group* pali *Matthaia, Marka, Luka* leh *Johana Group*-tea inṭhen a ni a. Kumin chhung atan *Group* tinte'n *Budget* Rs. 8,000/- neiin an remchan dan angin *Branch*-ah an chhung lut ṭhin a ni. *Group* hla zir tha leh inkhawm ṭha lawmman kum

chanveah leh kum tawpah pek thin a ni. *Member* hla hnuh hnaih nan leh *member* naupang zawkte *talent* hai chhuah nan *Group* inelna, KṚP *Week* hlimawm leh hlawkpuiawm tak hman a ni baw. Tin, kumin chhungin *Group* tinte'n Thawḥṭan zan inkhawm vawi khat ṭheuh *Group Night* atan an hmang.

Branch Committee hnuaiah *sub-committee* hrang pariat – *Programme, Evangelism, Sound & Light, Decoration, Reception & Ushering, Zaipawl, Refreshment* leh *Centenier-te Branch* tha tichak tura din a ni a. Heng *sub-committee-te* hian KṚP *programme* bakah kohhran ni pawimawhahte ṭangkai takin hna an thawk ṭhin a ni. KṚP chanchinbu *Centenier* tih chu *Branch* din

tirh atāngin vawiin thlengin kar tin khaihlaik awm lova chhuah thin a ni.

Thawhtān zan inkhawm hi *Sermon, Praise & Worship*, KṮP kum puan zir hona atan hman thin a ni a. Pathianni chhunah ṭawngṭai inkhawm neiin, Nilai zan inkhawm ban apiangin *member* hlate pual bik ṭawngṭaina hun hman thin a ni. *Evangelism Sub-Committee* hmalaknain zan reiah khawpui chhungah ei tur semin rawngbawlna neih thin a ni a, *Branch* huam chhungah *member* hlate tlawh chhuakin, remchan dan azirin *Home Crusade* neih thin a ni. *KṮP Help Line* siam a ni a, Pathianin mal a sawm a, a hlawk hle. *Member* biak in hawnga nupui pasal nei an awmin lawmpuina thilpek hlan thin a ni a, biak in kawtah *banner* leh *flag* tarin chawimawi thin an ni. *Member* thi an awmin Pathianni tlai remchangah *fellowship* neia ralna hun hman thin a ni. CKṮP *Leader* sawmin Thawhtān zan vawi khat hun hman ho a ni bawk.


Kohhran zaipawl rawngbawlna pawh tluang taka kalpui niin, kohhran ni pawimawh leh hun bikahte zaipawl an nei thei zel a,

zaipawl hmasawwna a nih beiseiin *Zaipawl Night* hman a ni a, zaipawl *Group* intihsiakna neih a ni. Kum tawpah mi mal, zaipawl hla zir ṭha lawmman pek thin a ni bawk.

Kumin chhunga *Branch budget* chu Rs. 7,34,247 a ni a, *Project* hrang hrang KṮP *Room* tihchangtlun, *Branch* dang tlawh, mi harsate pual neih a ni a. Pathian zarah kan tihlawhtling thei a ni.

Tin, *Branch* din champha pualin *Civil Hospital*-ah thisen pe tura inbuatsaih mek a ni bawk. *Member*-te rinna thutiam (*Faith Promise*) chu *Branch Committee Member*-te'n bial insiamin thla tin khawn thin a ni a, sum hmuhna hnar lian ber a ni. Heng bakah hian remchan dan anga sum tuak thin a ni.

Thawhtān zan inkhawm-ah hmasawwna hmuh theihin a lang a, inkhawm boruak a nuam thei hle. Kumin chhungin *member* pahni *missionary*-in an chhuak thei a, *member missionary*-a chhuak mek pakua an awm a, Pathian thu zir pathum an awm mek a, kohhran kaltlangin *missionary* 12 chawm a ni bawk.



HRINGLANG TLÁNG

Hruaitu Arsi Zai ri mawi!

Mut a tum zet a. Mahse, hriat chhuah thut nei ni awm tak hian a khum sir a ñingtang hlui lam tawh chu a'n ban a, a kut chuan an thai ri tang a. Joy Singh-a hi Manipur atanga Jorhat Agriculture College-a rawn lut a ni a. A ñhianpa Ramchhana nen Freshers Day-ah an zai dawn a. Kristian ni lo mah se, Ramchhana hla thlan, 'Shout to the Lord' tih hla sak an tum a ni.

Jorhat-ah hian Homopathy doctor zirna hmun lar tak pakhat a awm bawk a. He college-ah hian BHMS zir theihna quota Mizoram sawrkar pawhin a nei ve nghe nghe a. Chu quota chu Rinmawia chuan a chang ve hlauh mai a. Jorhat chu an la kal ngai si lo va, Vai ñawng lah an thiam der bawk si lo. Thil chinchang hre deuh an han rawn a. "Eastern Theological College-ah thleng phawt ula, chuta ñang chuan puitu in zawng mai dawn nia," an lo ti a.

Rinmawia leh a u (Vengva em em bik lo)-te chuan Sumo ticket lain, Mizoram House, Guwahati an thleng thla ve ta rawih a. Tukñuan an ei kham chuan, "Bus chu Bus station-ah

a chhuak ñhin a lawm," tiin, auto rickshaw driver chu bus station (ISBT)-ah an indahtir a. Jorhat bus an zawng a, engtin tin emaw chuan an hmu ve leh mai bawk a. Sanjibani tih inziak bus lian pui chuan Jorhat lam pan chuan an tlan ve ta pur pur a.

"Jorhat Jorhat....." bus conductor-in a tih hnu deuh, kawtthler eng laiah chuan an ñum thla ve chhak a. Zan dar 10 vel a lo ni tawh a. Kawng sira rickshaw-pu hnenah chuan, "Eastern Theological College," an han ti ve tawp a. "Haa!" a ti a. "A hria nih dawn hi," an ti a, cycle rickshaw-ah chuan an lawn a. Nakinah chuan kawtthler reh angreng deuhvah hian an ding a, Vaipa chuan, "ETC,"

a ti a. Chuan man an pe a, an chhuk a.

Eastern Theological College ni mai tura an ngaih building lian tak chu an pan a. Gate lian pui hi a lo nei a, a inkalh bur mai a. Rinmawia chuan, "Ka u, building-a mite saw kan au vak mai dawn em ni?" a ti a. A u chuan, "Paw! hlei nem. Mahse, engtin nge kan auh ang? 'Anybody here?' nge 'Bachau' kan ti ang?" a ti a. Auh dan tur chu an ngaihtuah ngial a, an hriat mai loh bakah building chu a thim em vangin mi zawh tur zawh tha an ti ta zawk a. Pawnthuah khai chuan an kual an kual a, mihring hmuh tur lah chu an vang em em a.

Chutia beidawng rilru taka, hriat ngai loh Vai rama ding leh vei bo tawna an vah an vah lai chuan, Rinmawia u chu a ding chut a. 'Chu chu....i hria em? Hmm hmmm hmm, hmm hmm hmm,' a ti a. Uiin sa rim a hria ang mai hian, hma lam chu chak deuhvin a pan a. A ding

ta chut a, an piaha tualzawl zau deuh hnunga in pakhat chu a kawk ta a.

"My Jesus, my Saviour, Lord there is none like you..." tih hla kha t̃ngt̃ang perh hian an lo sa vau vau mai a. Khual khuaa chhungte in thleng ang mai hian an thla hi a muang nghal sawng sawng a. Tualzawl pal tlanga zai ve rut rut chung chuan chu zaina in chu a pan ta nul nul a, a hnungah Rinmawia'n a zui a.

Hostel ang deuh room-ah hian mi pakhat hi a lo zai a. Tukverh at̃ang chuan Rinmawia u chuan, "Eastern Theological College-ah thlen kan duh a," a va ti ve pawp mai a. Joy Singh-a chuan a t̃ngt̃ang perh lai chu a dah a, a lo hazwi hau mai a. Rinmawia u thusawi chu a hre thiam chiah lo va; mahse, English-in an inbe zui a, Mizo awmnaah a hruai ta a.

Rinmawia te unau tan chuan kha zai ri kha a va hlu tak em!

FAKZAI

CKTP leh Synfo t̃ang kawp chuan Nov. 22, 2018 zan dar 7 khian Ramhlun Kohhran Jubilee Hall-ah 'Fakzai' hun buatsaih an tum. Programme hi Synfo chuan Hruaina Eng chanel-ah live-in a pe chhuak dawn a. Hlawhtling taka hman a nih theih nan leh, in lama lo entute'n hlawkna an chhar thar ngei theih nan Pathian hnenah i hlan ang u.

Keimahni



Ṭawngṭai rual

57th KṬP Gen Conf. Rorel VI:b thu bawhzuitu, Ṭawngṭai Sub-Committee-in ruahman-na a siam angin August 27, 2018 (Thawhṭanni) zan inkhawm banah khan Mizoram pumah Branch-te'n MLA General Election pual te, sual thupha chawi te, ruihhlo ngaite leh member hlate pualin ṭawngṭai rual an nei thei.

Hospital Charity Fund pek a ni

September 5, 2018 (Nilaini) chawhnu dar 3 khan Hospital Charity Fund atan a thawh khat nan zan khat inkhawm thawhlawm lak khawm aṭanga hmuh tawh, Rs. 5,00,000 chu Synod Hospital Director, Dr. L.H. Thanga Singson hnenah CKṬP Leader, Rev. Dr. K. Lallawmzuala'n a hlan a, hlannaah hian CKṬP Committee ṭhenkhat in an ṭawiwam nghe nghe. Synod Hospital

aṭang hian Hospital Charity Fund atana CKṬP-in pawisa a dawn avanga lawm thu sawina lehkhah kan dawng.

PYF Youth Camp thlen chungchang

CKṬP Committee 715:XVI -ah PYF Youth Camp thlen ṭha kan tih thu te, a hun tur October 19-21, 2018 chu November 2-4, 2018 chhunga sawn ni se tih leh, a thlengtu tura rawtna kan neih chu Synod OM chuan Youth Camp thlen leh a hun sawn chu ṭha a ti a, a thlengtu tur atan chuan hmun hnai deuh ni thei se a ti a (vide OM 14:25 of 5.9.2018). OM thurel bawhzui hian Sept 7, 2018 (Zirtawpni) ṭlai dar 5:00 khan CKṬP OB leh Executive Secretary-te inhmu khawm chuan Ramhlun North Kohhran ngen nise tiin a rel a. Ramhlun North Kohhran chuan PYF Youth Camp lo dawn hi an remti a, a hun tura rawt, November 2-4, 2018 (Nov. 4 Pathianni) hi

kan Kohhran ni pawimawh, Khawvel Sunday School Ni nen a inruval avangin CKTP OB chuan ngaihtuah thain, a hun tan hian November 9-11, 2018 ni se tiin a rel.

PYJC kal remtih thu

Presbyterian Youth Joint Committee, Phai Synod chuan kum 2019-a Khampata Triennial Conference-an neih turah min rawn sawm a, an sawmna hi OM-a thlen a ni a, OM chuan CKTP OB pathum leh Synod Choir te kal a remti a, Synod Choir kalna leh haw lam senso tumsak an remti baw (vide OM 14:25 of 5.9.2018).

Committee Meeting wawi 716-na chuan PYJC Triennial Conference, Khampat, Myanmar-a kal tur hian Upa Rosangliana, Asst. Leader, T.Upa Rochungnunga, General Secretary leh Tv. Ricky Lalrammawia Ralte, Asst. Secretary te a ruat.

YRC pual fund zawng tura NextCom nena hmalak remtih thu

CKTP 715:V(1) chuan SEC 256:32(3)-in min lo phalsak tawh anga YRC tana fund zawna kawngah NextCom Consultancy nena thawh dun

rawtna chu OM chuan rem a tih thu leh, SEC-ah report ni se tia a rel thu hriattirna kan dawng (vide OM 14:35 of 5.9.2018).

Synod Choir music video Pathian hnenah hlan

Kum 2018-2020 Synod Choir music video hmasa ber 'Vanram ropuah' tih hla, Pu T. Laldintluanga, Synod Choir Conductor hla phuah chu September 13, 2018 (Ningani) zan dar 9:00 khan Choir Cabin, Synod Conference Centre-ah hlanna inkhawm neih a ni a. Music video hi Rev. Dr. K. Lallawmzuala, CKTP Leader-in Pathian hnenah a hlan.

Praise On hlanna

Synfo-in Praise On 2018 a buatsaih Pathian hnena hlanna September 14, 2018 (Zirtawpni) zan dar 8:45-a Mission Veng Kohhran Hall-a neihah CKTP Committee Member-te kal tura Synfo-in min rawn sawm angin CKTP Committee Member-te kan kal thei; Praise On 2018 hi Moderator Rev. F. Lalrinnunga'n Pathian hnenah a hlan. Praise On 2018 Organising Committee member-ah hian CKTP Committee

member - Tv. Ricky Lalram-mawia Ralte, Asst. Secretary leh Dr. David C. Vanlal-fakawma, Committee member-te an tel.

NACO hotute nena inkawmna

National AIDS Control Organization (NACO) hruaitute chuan Mizoram an rawn tlawh a. Mizorama HIV darh nasa lutuk leh a venna chungchangah Mizorama pawl hrang hrang hruaitute a ko khawma, NACO hruaitute nen hian Sept. 18, 2018 (Thawhlehi) khan Aizawl DC Office-ah inkawm a ni. Hetah hian CKTP aiawhin Rev. Dr. K. Lallawmzuala, Leader leh Tv. C. Malsawmtluanga, Committee Member (Ruihhlo leh A Kaihnhawih Sub Committee Secretary) te an kal.

Mizoram Synod Choir Report (Aug 24 - Sept 23, 2018)

Hla zir zat

Tum 6

Programme neihte

(i) Aug. 27, 2018-ah Armed Veng South Branch KTP Zaipawl Night

ii) September 3, 2018-ah

Bungkawn Vengtharah Rev. B. Sangthanga, Synod Executive Secretary zuiin.

iii) Sept. 14, 2018-a Mission Veng Kohhran Hall-a Praise On hlanna Inkhawmah.

iv) Sept. 23, 2018-ah Sihphir Kohhran Music Festival an hmanpui.

Music Video hmasa ber

September 13, 2018 khan Mizoram Synod Choir 2018-2020 video hmasa ber chu Rev. Dr. K. Lallawmzuala'n Choir Cabin-ah a hlan.

Hla record a ni

September 21, 2018 hla zir bânah 'Zalenna' tih hla chu Masky Records, Ramthar North-ah audio recording tih a ni.

Sum hman dan

September thla chhunga Synod Choir sum hman : Rs. 25,600/- (*Cheng singhni* sangnga zaruk) chiah.

NOVEMBER KRISTIAN THALAI

Cover design by

*Lenry M.S. Dawngliana,
Ramblun North*